



**СУДЬЯ  
ӘДЕБИ – БАСТЫ  
НАЗАРДА**

2-бет



**МЕМЛЕКЕТТІК ТІЛДІ  
БІЛМЕЙТІНДЕР  
МЕМЛЕКЕТТІК  
ҚЫЗМЕТКЕ  
АЛЫНБАСЫН!**

5-бет



**ТАҚЫРҒА  
ОТЫРҒЫЗДЫ**

8-бет

# ЗАҢ

ZANMEDIA.KZ

✉ zangazet@mail.ru

№58 (3589) 8 тамыз 2023



# газеті

Қоғамдық-саяси, құқықтық газет

ЖУРНАЛИСТІК ЗЕРТТЕУ

## ASTER.LTD -

## ҚАРЖЫ ПИРАМИДАСЫ МА?



Газет редакциясына «Aster.LTD» деген аты дардай компанияның инвестициялық қызметінен зардап шеккен бір топ адам шағым жолдады. Олар бұл компанияны қаржылық пирамида деп есептейді. Алаяқтарға алданғандардың қатарында тек Алматы, Тараз, Шымкент, Ақтау, Қызылорда қалаларының ғана емес, басқа өңірлердің тұрғындары да бар. Жәбірленушілер жергілікті полиция органдарына компанияның қызметін тоқтату, сайтты жабу және шығынды өтеу туралы өтініш берді.

(Соңы 3-бетте)

СӨТІ ТҮСКЕН СҰХБАТ

Серік БАЙБАТЫРОВ,  
қоғам қайраткері, сот саласының  
ардагері, Алматы облысының  
Құрметті азаматы:

### «ҚОҒАМНЫҢ АЛДЫНДА ЖҮЗІМ ЖАРҚЫН»



– Серік Көтенұлы, сот саласында ұзақ жыл еңбек еткен, қоғамның дамуына үлес қосқан танымал азаматтың бірісіз. Өткенге көз жібергенде ең алдымен не есіңізге түседі? Жалпы, сізді не алаңдатады?

– Барды бағамдап, жоқты түгендеп отыру – заңдылық. Менің ойымша, бүгінгі қоғамда көп сыналып жатқанымен, Кеңес өкіметінің ұстанымдары, бағыты көп жағдайда жақсы болды. Жақсы деп айтуға бір себебім, ол тұста елді басқаратын азаматтар қызметті төменнен бастайтын еді. Мысалы жоғары оқу орнын тәмамдаған азамат біртіндеп көтеріле келе алдымен совхоз, оның жұмысын қамшы салдырмай алып кетсе аудан басқаратын. Одан сенімді ақтап, жақсы жағынан көрініп жатса партияның резервіне кіргізіліп, облысқа қызметке алынатын. Онда да үшінші, екінші хатшы сатыларынан өткенде ғана бірінші хатшы болатын. Ал қазіргі заманда ше? Қазір жоғары оқу орнында оқып жатып биік мәнсапқа ие болатындар бар.

Көпшілікке түсінікті болу үшін бұл сұрақтың төркінін білім беру саласынан бастайын. Шыны керек, соңғы үдерістер көрсеткендей бізде қаншама жастар мемлекет қаражатымен, тіпті жеке қаражатымен шет елдерде оқып келді. Бірақ барлығы осы шекара асып қалған мамандықтары бойынша жұмысқа орналаса алмайды. Өте ақылдылары бірнеше тілді үйреніп, шет елдерге қызметке кетіп жатады. Осы тұста бір шындықты аша кетпесек жастарға қиянат болар. Жалпы, жастардың арасында өз күшімен білім алып, талпынып, өмірден өз үлесін алып жүргендері баршылық.

(Соңы 4,5-бетте)

СОТ СӨЙЛЕСІН

## КАССАЦИЯЛЫҚ ІС ЖҮРГІЗУ - КҮРДЕЛІ ПРОЦЕСС

Қазақстанның сот жүйесі істерді қарау процесінің тәуелсіздігі мен әділдігін қамтамасыз ететін бірқатар принциптерге негізделген. Сондықтан кінәсіздік презумпциясы Қазақстандағы сот жүйесінің негізгі принциптерінің бірі. Бұл қағида бойынша әрбір айыпталушының кінәсі белгіленген тәртіпте дәлелденгенге дейін кінәсіз деп есептеледі. Әрбір Қазақстан азаматының әділ сот талқылауына құқығы бар, оған сәйкес қорғану, өз құқықтары мен айыптары туралы ақпаратқа қол жеткізу, куәлардың қатысуы мен жауап алу құқығы кіреді.

Елде қылмыстық істер бойынша заңды күшіне енген сот актілерін қайта қарау ерекше жағдайларда, қатаң түрде ҚПК-нің ережелеріне сәйкес жүзеге асырылуға және олардың орындалуына кедергі келтірмеуге тиіс.

Іс кассациялық сатыға келіп түскен күннен бастап бір айдан кешіктірмей қаралады. Бұл мерзім істің күрделі немесе көлемі үлкен болуына байланысты, сондай-ақ, өзге де дәлелді себептер болған кезде істі қарайтын соттың қаулысымен, бірақ әр ретте бір айдан аспайтын мерзімге ұзартылуы мүмкін.

Кассациялық сатыдағы сот отырысын тағайындау негізінде алдымен шағым, наразылық келіп түскен кезде кассациялық сатының судьясы істі талап етіп алдырып, ол келіп түскеннен кейін оны қарау күнін белгілейді. Екіншіден, тараптарға істің кассациялық сатыда қаралатын уақыты мен орны

туралы хабарланады. Күзетпен ұсталып отырған сотталған адамды шақырту туралы мәселені кассациялық сатыдағы сот шешеді. Күзетпен ұсталып отырған сотталған адамнан оның жағдайын нашарлатуға бағытталған шағымды немесе прокурордың наразылығын қарау кезінде кассациялық сатыдағы сот істі сотталған адамның тікелей қатысуымен не аталған адамның қашықтықтан қатысуын қамтамасыз етуге мүмкіндік беретін ғылыми-техникалық құралдарды пайдалана отырып қарау туралы қаулы шығарады, оны орындау үшін тиісті органдарға жібереді.

Үшіншіден, кассациялық отырыстың орны мен уақыты туралы уақытылы хабардар етілген адамдардың келмеуі істі қарауға кедергі болмайды.



Жекеше айыптау істерін қоспағанда, кассациялық сатыдағы соттың отырысына прокурордың және қорғаушының қатысуы міндетті.

Кассациялық шағымдар, наразылықтар келтіру құқығы бар адамдар, сондай-ақ, үкім, қаулы шығарылғаннан кейін тапсырма алған сотталған адамның, ақталған адамның қорғаушысы немесе жәбірленушінің өкілі кассациялық сатыдағы соттың отырысына барлық жағдайда да жіберіледі. Берілген шағымдарды немесе наразылықтарды не оларға қарсылықтарды негіздеп сөйлеу үшін өздерінің өтінуі бойынша оларға сөз беріледі.

Егер барлық қатысушылар шағым

жолдаған кезде не сот отырысы туралы хабарлама алған соң іс жүргізуді өздерінің қатысуынсыз жүзеге асыру туралы мәлімдесе, сот істі тараптардың қатысуынсыз қарау туралы шешім қабылдауға құқылы. Егер сот олардың келуін міндетті деп таныса, істі қарау кейінге қалдырылады және тиісті адамдарды шақырта отырып, сот отырысының жаңа күні тағайындалады.

Істерді кассациялық сатының қарау тәртібі негізінде төрағалық етуші сот отырысын ашады, қандай істің қаралатынын және кімнің кассациялық шағымды немесе наразылығы бойынша екенін хабарлайды. Содан кейін төрағалық етуші соттың құрамын, іс бойынша тараптар болып табылатын және сот отырысына қатысып отырған адамдардың тегін, сондай-ақ, аудармашылардың тегін хабарлайды және отырысқа қатысып отырған адамдарға істі кассациялық сатыда қарау кезіндегі құқықтарын түсіндіреді.

Егер процеске қатысушы кассациялық шағым, наразылық беру кезінде шағым жасау мерзімін өткізіп алынғаны туралы өтінішхат мәлімдесе, онда осы өтінішхат бірінші болып қаралуға жатады. Өтінішхат негізді деп танылған кезде сот оны қанағаттандыру туралы және мерзімін өткізіп алып берілген шағым, наразылық бойынша кассациялық іс жүргізуді тоқтату туралы қаулы шығарады және істі кассациялық сатыға уақытылы берілген шағым, наразылық бойынша қарауды жалғастырады.

Істі қарау кассациялық шағым немесе наразылық берген процеске қатысушының сөзінен басталады.

Егер мұндай қатысушылар бірнешеу болса, төрағалық етуші тараптардың пікірін ескере отырып, олардың сөйлеу кезектілігін белгілейді. Кассациялық сатыдағы сотқа қатысатын прокурор қарастырылып жатқан кассациялық шағымдар бойынша пікірін айтады, наразылықта көрсетілген дәлелдерді баяндайды, іс бойынша жасалған сот актілерінің заңдылығы туралы қорытынды береді.

Сөз сөйлеушілер кассациялық шағымда немесе наразылықта келтірілген дәлелдерді растау немесе теріске шығару ретінде кассациялық сатыға қосымша материалдар ұсынуға, бұл ретте сотқа олардың қандай жолмен алынғанын және оларды ұсыну қажеттігі неге байланысты туындағанын хабарлауға құқылы. Қосымша материалдарды тергеу әрекеттерін жүргізу жолымен алуға болмайды. Сот тараптардың пікірін тыңдап, қосымша материалдарды қабылдау немесе қабылдамау туралы қаулы шығарады. Қосымша материалдар, егер олардың істі шешу үшін маңызы бар болса, егер мұндай материалдарда қамтылған деректер немесе мәліметтер қосымша тексеруді талап етпесе, үкімнің күшін жою немесе оны өзгерту үшін негіз бола алады. Өзге де жағдайларда қосымша материалдар сот үкімінің, қаулысының күшін жою және істі апелляциялық сатыдағы сотқа жаңадан қарауға жіберу үшін негіз бола алады.

**А.ЖОЛДЫБАЕВ**  
Шиелі аудандық сотының  
судьясы  
Қызылорда облысы













